

Die irren Maiden 2021

Ds Verschleierigsverbott erhitzt di Gmüeter i der Schwitz
Das isch ja nid z erschte Mal doch warum äch grad itz?
Muesch nid wit go sueche u o gar nid lenger frage
S'isch wüll si nümme Maske möge trage.

Söttsch mit dine Finger nümm im Gsicht desumewusle
U o keni Böögle meh zur Nase use gusle
Derfür seit itz ke Mönsch meh öppis we d mit dine Tatze
Härzhaft tuesch am Füdle hinge chratze

Alles fahrt Schi

Alles fahrt Schi, alles fahrt Schi
Schi fahrt di ganzi Nation
Alles fahrt Schi, alles fahrt Schi
Wänge, St. Moritz e Hohn
Es git ja nüt Schöners juhee, juhee
Als Quarantäne im Schnee
Für 10 Tag es Hotel vo inne gseh
Ir Quarantäne im Schnee

Ir Zyt vo Social Distancing da fählt de Mönsche d Nöchi
Doch was der René Fasel gmacht het fingi trotzdem d Höchi
Dass ihm en Umarmig fählt das gseh n i ja no i
Doch muess es grad dr Lukaschenko si

Stress uf höchster Äbeni, me schaltet Awält i
S sigi es blamabels Foto im ne Kuvert gsi
Druffe sig dr Berset u wird itz dermit erpresst
Är heig si Frou drum ohni Maske küsst

D Wirtschaft isch am Bode es geit mängi Bude zue
Derbi wär d Lösig naheligend was me da chönnt tue
We der Ueli Murer nume chli würd witerdänke
U jedem Härtefall chli Kampfjet schänke

Dr Blocher het uf z Ruheghalt itz jahrelang verzichtet
Är heig schliesslech gnue Gäld het är lutstarch umebrichtet
Plötzlech wott er alls uf ds Mal, i gloub dä ärmschti Tropf
Het ganz e andre Virus i sim Chopf

Es het am Sir Sean Connery sis letschte Stündli gschlage
Unvergässe als James Bond bim Bösewichte jage
Im Himu wird ihm Nektar u Ambrosia serviert
Das nimmt lieber gschüttlet u nid grüehrt

Das Ständemehr verstah n i nid, i cha mers nid erkläre
Dass 1 Stimm usem Appezäll 40 Zürcher Stimme wäre
Das Wahlsystem chönnt ja sogar dr Trump derzue verfüehre
O mal bi üs ir Schwiz cho z kandidiere

Dr Sturm uf die Bastille hei mir grad live chönne verfolge
Unterricht ir Gschicht u das diräkt vor üsne Oue
Ds Frankrich hei si dä denn köpft wo ufem Thron isch gsässe
Das hei si leider z Washington vergässe

Ds Kandertal Blausee Mitholz het öppe langsam gnue
Itze chunnt zum Schlaggeschotter Pressschlamm no derzue
D Bevölkerig isch glade u chönnt bim evakuere
O ohni Munition grad explodiere

Ha tröimt i heig im Hirschegrave z Velo wölle lah
Plötzlech gsehn i mi imene dunkle Tunnel stah
Es wises Liecht am Änd, isch äch mis Läbe itz verbi?
S isch nur dr planet Bahnhof-Zuegang gsi

I ha es Bärefäll verchouft, dr Bär no gar nid gschosse
Plötzlech isch der Fällpris gstige, das het mi verdrosse
I sötts drum wider zrügg ha, schliesslech schiess i nid uf Bäre
I wott ja nur das Hedfond-Gstürm erkläre